

芬陀利室詞集

機讀寫墨樓內史序朱君酉生之詞曰意蓄語中韻溢弦外又云言苦者思沈辭隱者志鬱喟然曰何甚似吾劍人之詞也劍人才氣高邁務爲有用之學不屑屑以詩名而竟以詩名其於詞也亦然每一申紙哀豔欲絕比興所作瞬眇無極顧君子山評之以爲淒厲動魂芬芳竟體得力在白雲白石間是已雖然詞者意內而言外也今海內多知言知劍人之意乎否夫誰與同憂患者勿以示人可也戊申冬十月靈石山人支機序

梅瘦而清石瘦而峭合梅與石爲君寫照以梅之韻兼石之奇似君氣骨亦似君詞出入於佛不背不觸文字因緣莫非語錄審音正誤爲詞功臣斯是傳作斯是傳人主子八月杪讀劍人仁兄倚聲大集題此奉正白下八十八叟侯雲松

壬子八月劍人秋賦來省貽汾招大江南北諸名流一集於琴隱園再集於師子窟三集於周綺霞女郎涼珠閣劍人短小精悍出語必驚坐客平生蹤蹟甚奇天下方多事此有用才也詩古文外尤精於詞推究宮調融會意言神明于矩矱之中而才情豔逸不爲律縛貽汾老矣安得不傾倒其人哉將行索贈言窮日力思之得八字曰黃絹幼婦外孫齏曰時九月朔後一日湯貽汾雨生氏讀

論石品有三曰縐瘦透詞亦若是而已乾嘉來此道益昌余不爲之而嘗尋其原究奚外於詩彼自狹小故靡讀劍人詞可僅以詞人目之乎安吳包世臣

劍人先生名滿天下客歲偕月坡丈徧訪不得見今秋晤雨嵐始悉寓館潔晨走謁深慰十年渴思示讀大詞如聽鈞天廣樂如見神仙化人瓊異豔絕刻露精微唐耶宋耶不得而名之矣急挑鐙永夜與大兒分錄一通朝夕焚香頂禮讚歎壬子八月白下教弟凌志珪拜讀謹識

劍人論詞以意爲主嘗薄樊榭頻伽有文章煙月之譏其自爲詞則寓情縣渺取譬宏深摹繪萬狀不名一家語金洛云董晉卿謂詞以無厚入有間吾詞以有厚入無間其旨趣如此願以

劍人詞爲勝於樊榭頻伽恐未必信也文字有靈亦聽之千秋而已上元王金洛

小令如花間中調如北宋慢聲如南渡哀感頑豔淒入心脾亦由其流離世故自傷情多也會稽王潤四篁拜讀於吳門舟次時捧檄彭城不克暢敘匆匆倚裝書數語而別咸豐二年秋八月

大詞取徑於白石玉田參變於稼軒放翁一洗靡浮豔之習而又正律審音爲斯道力闢榛莽必傳無疑時方以三十六湖漁唱就正老女捧心自忘其醜亦恃惠子知我耳高郵王敬之詞以清真爲上綺麗次之運清真於綺麗之中前惟草窗近則梅里吾於是集亦云第姚燮拜讀

聞劍人名久矣辛亥冬始見之於海上買醉黃壚踏雪聯句逸興遄飛豪氣勃發名下固無虛士也翌日卽偕梅伯王叔約軒訪劍人於竹林禪院出詩詞相示自謂於詞之音律頗有心得今世失傳久矣劍人固不甘以詞人自居卽以詞論綺麗清淑豪放纏綿兼而有之出入南宋諸名家殆可抗手夫豈近人所能及哉讀竟爲志傾倒咸豐二年冬十二月上旬吳郡王韜仲毀甫識於滬城北郭蘅華行館

題辭

百字令

長洲
孫麟趾

舊遊如夢記星辰昨夜水明簾底落魄青衫詞一卷多少天涯
情味絲竹中年鶯花小劫字字含悽淚江湖飄泊可憐銷盡英
氣便教傳向人間旗亭唱徧那識涼涼意曠世風流誰得似
不是尋常羅綺醉紙迷金愁香豔粉絕調千秋繼啼蜚深巷小
門聽雨閒閉

聲聲慢

上海
王慶勳

殘月屯田埜雲石帚好隨詩卷長畱賭到旗亭古今幾箇名流
紅牙者番拍出更堪憐閒怨閒愁評子細待看花沾酒一醉蘭
舟漫說瓊樓風月甚青天碧海渺渺悠悠溪住羅敷煙波試

語眠鷗一銚最憐雙瑄寫烏絲細畫銀鉤消豔福便玉臺佳詠
同播千秋

齊天樂

同邑 陳升

芳蓀采徧相思早年時綺懷難訴鳳紙題香鴛牋寫夢都似不
情不緒江湖倦旅歎怨瑟空彈騷心多苦漫負才華翠蛾顰損
感遲暮清音應洗俗耳便零絲脆竹何似鷗語病蝶蕭吟哀
蟬酸誅都付十三鈿柱知音幾許祇賦就湘花些歌淒楚誰贈
瑤璫佩環空際度

芬陀利室詞集目錄

淞北玉鮓生王 韜紫衲編刊

卷一

綠簫詞五十三闕

卷二

碧田詞五十一闕

卷三

紅衲詞三十九闕

卷四

青瑟詞三十八闕

卷五

白華詞二十九闕

芬陀利室詞集卷一

寶山蔣敦復純甫著

長洲王 韜紫詮刊

綠簫詞

浣谿紗

海月紅生夜碧流
花魂扶影下西樓
簫聲誰按小梁州
未入夢來先怯別
便爲雲去也多愁
一絲風挂翠簾鉤

水龍吟

羈人善感秋事無慘
昨影前塵淒然欲絕
填此遣愁

可憐宵夢無成
酒醒空倚秋鐙
語江湖十載年光
一背燕鴻來去
帽影圍青衫痕
翦碧峭寒聽雨甚
水流花謝人間
天上儘難

著銷魂處 縱使魂銷未盡問潘郎鬢絲何許如今又況飄零
不似少年心緒怨極愁多無情有思幾回遲暮記寶釵樓上黃
昏小病黯天涯路

生查子

傷春愁見花教放簾櫳下只是嬾梳頭鸚鵡將人罵 遠山眉
黛多新樣偏難畫守住臂彎砂玉骨剛盈把

繡鸞鳳花犯

春寒水仙未花用草牕韻寫之

澹黃昏泠泠碎語瑤波含春淚冷雲何意空隔斷湘天清怨難
寄東風只在紅闌際玲瓏吹未起漫注念水晶簾卷玉人眠夢
底 煙消霧瘦結同心纖羅帶暗約山中蘭芷愁獨立尋世外

渺然幽味還不是芳梅伴侶夜來憶香篝籠素被仙掌小金盤
滴露月明寒影裏

無夢令

春巷悵悵微雨門外碧桃花樹濃笑鬪牆聞人在畫堂深處畫
堂深處驀地一聲鸚鵡

行香子

下了簾櫳換了熏籠卸雲鬟退了鞦韆弓傷心怕見鸞枕黏紅把
粉痕銷愁痕繡淚痕縫 鐙又朦朧漏又丁冬病霜天又是孤
鴻斷魂幾縷吹散瑤空似一絲煙一絲雨一絲風

浪淘沙令

斷腸人遠傷心事多鍾隱云日來以淚洗面聊填數闋

亦短歌不能長也

樓外雨瀟瀟
鐙影愁飄秋心都付與芭蕉
又是一枝梧葉下
特地魂銷
前事憶紅橋
聲咽瓊簫
畫中人送鏡中潮
腸斷去年江北淚流到今宵

前調

夢裏楚山孤
煙水饒餬天涯還怕有愁無
昨夜星辰今夜雨
後夜江湖薄倖怨狂夫
信也稀疎
畫廊鸚鵡一聲呼
紅豆有情應化淚
莫化蘼蕪

前調

孤盡好年華
好事終賒玉人前度葬桃花
何苦五更風又雨
逼近牕紗
江上冷琵琶
芳草天涯畫樓惆悵
綠陰遮燕子背人

何處去一樣無家

前調

落葉滿江潯玉宇蕭森秋聲都在古牆陰但是無情誰解聽人
自傷心 心事託瑤琴短調長吟人間何處覓知音判取此生
愁裏活不道而今

紅香

白石道人石湖詠梅製仙呂宮二闕曰暗香疏影玉田
生用其調詠荷花荷葉名之曰紅情綠意余詠紅綠梅
二種兼取兩家製調命名之意曰紅香綠影

紅梅

淡粧濃抹甚瘦瓊尙帶一痕殘雪淺薄東風卻恐鉛華易飛歇

珍重芳心未變千里夢故人輕別看陳雨灑徧
臘脂清韻更愁絕
鑪熱火初活盪玉女酒魂沁入花骨海珊夜折
笑嚼流霞弄明月歌罷雙聲絳樹騎紫鳳歸來
瑤闕漫寂莫空自賦廣平冷鐵

綠影

綠梅

煙霏霧結擁寶釵十二鬟影飄瞥一夢羅浮碎
佩零璫定有翠禽能說萼華小謫瑤天渺問幾
度羊家風月莫破瓜負了芳年
粉鏡曉粧猶怯誰點石螺冷黛瘦細微貼額
剛近眉纈羌筵橫飛珠淚盈盈金谷墜煙銷歇
佳人不見空延伫想日暮碧雲初合倚竹間
短袖天寒還未綠陰時節

換巢鸞鳳

憶遠用梅谿韻

月媚風嬌正人歸翠樹夢度藍橋跨鸞權倚玉倒鳳誤吹簫春
情都付與纖腰沈郎帶圍和煙也銷待他日教細認燭花偷照
愁悄思渺渺團扇未涼時在郎懷抱不恨天涯水遙山遠只
恨無端芳草草自青青徧天涯可憐人向天涯老單衾寒細沈
沈蓮漏催曉

浣谿紗

豆蔻芳年二八交嬾隨阿母刺鸞綃盈盈做出許多嬌寫不
成書喚玉腕吹難合調怨瑤簫鳳鞵新樣情人描

前調

宜笑宜顰淺黛橫
女兒心性未分明
避人踪跡怕人輕
花氣近身蜂又蝶
春愁對語燕還鶯
者般時節那般情

前調

嬾娜腰身半不支
慳慳消受落紅時
春風八十一顰脂
纖指怕寒收粉筆
小瓶蘸水養花枝
綠牕微雨聽彈詞

前調

僥倖蘭盟不自持
小名生悔被伊知
羅巾教看定情詩
一枕鴛魂嫌夢窄
雙頭蓮蕊怕風吹
夜來珍重臂寒時

前調

斜月西廊素影沈
花深深又柳陰陰
鞦韆邊細認露痕侵
羞贈宜男占草夢
似防結子妬花心
些兒酸處最難禁

前調

寬著春衫瘦可憐香桃無奈裏紅綿玉肌羞露泥郎眠
雛婢也知調舌語旁人猜是破瓜年虛名擔誤好因緣

前調

簇簇新粧看上頭笑拈蟾子在簾鉤嫁衣親動剪刀愁
逃學爛歸偎妾睡迷藏偷捉教郎搜小時提起十分羞

前調

才著銷魂已斷腸江南春盡燕辭梁思量長是不昏黃
畫裏滕王新蛺蝶機中衛女舊鴛鴦鈺聲二十五聲長

花犯

花陰用清真體

正惜惜黃昏小院疎簾澹流水二分香氣盪一抹珠煙嬌夢扶
起茜裙悄買秋千底銷魂曾此地繡幕外晝長人靜鵲聲彈碧
去淚作風前翠衫濕冥濛銀樓角于校切竚立不禁幽思苔印淺
沾羅襪玉鉤香膩遲佳約海棠月上羞暗觸金鈴驚犬吠莫又
到綠肥紅瘦穠春如霧裏

春霽

柳影用草牕體

眉樣誰描祗盈盈一水淺黛無色慘綠關河病紅池館天涯盡
換愁碧斜陽巷陌絮雲飛過空塵迹記那日聲嘶嫩鶯低罨畫
橋側文牕四面綺閣三層冷冷清清做成蕭瑟峭東風纖腰
罷舞菱花羞翳翠顰泣一把鬢絲收未得玉于句切闌干畔可憐

和夢和煙斷腸金縷更無消息

眉嫵

草色用白石體

又光風轉蕙暖水生蘋春意滿南浦一片銷魂地斜陽澹青青
千里何許綠蕪細雨把翠泥平埜重補隔楊柳望不分明裏連
天遠雲樹欲問王孫前度悵畫樓人去遮斷歸路薤玉春山
外紅根小香墳三尺深護拔心最苦化淚痕斑染荃土莫蝴蝶
飛來煙夢亂壞幫舞

露華

苔痕用玉田體

玉階艷冷記翠亭一角石瘦空青相思不見更無人處潛行閒

繞碧羅荒磴冒蒼煙夕照猶凝愁細碎蝸涎砌斷鱗粉牆傾
寂寂朱門深鎖歎繡涇瓊蕤鴛瓦霜梭遙岑又阻寸心莫負芳
盟黏東石華紺唾暈花磚殘淚紅冰尋舊迹昨作平宵鳳鞵露零

霓裳中序第一

白石老仙此調自云於樂工書中得商調霓裳十八闕
作中序二闕傳于世寒夜不寐呼鐙填此卽用其韻詞
之怨抑殆難爲懷古音亡矣識者當相賞於文字外可

爾

關河更渺極庾信羈愁吟未得人瘦不禁酒力正檐鐙亂敲危
風蕭索斜穿夢隙暗鐙偷照孤客菱花碎起來對影頓憶舊
顏色 岑寂素琴張壁怕絕調鮫人淚織天涯休歎浪迹拾翠

東城榼酒南陌主梅通氣息便九九寒消冷碧淒涼也瓊思瑤
想嬾臥水雲側

璫牕寒

九寒詞分詠得寒意

暮色侵雅雲容凍墨歲華驚晚江湖倦矣衰草夕陽天遠想空
山玉梅未花一聲老鶴流清怨有箇人小病袖痕扶羣倚風零
亂淒惋難禁慣算似水年華春歸休緩鷓鴣衾夢冷可憶夜深
孤館漏沈沈羅幃鎮垂蘭缸碧暈和愁顫更何心帳底銷金泥
酒雙鬢勸

采桑子

去年人倚鳳臺簫花也今朝月也今宵花月芳愁各自飄今

年人憶江南別風也騷騷雨也蕭蕭風雨離魂獨自銷

大酺

問一重山兩重水天涯知在何處春來慣消瘦儘羅衫寬著黛
眉愁嫵陌上花開樓頭燕過芳訊玉關通否無情終不信把前
番已悔後期還誤記楊柳陰中封侯人遠白頭飛絮 最憐香
夢苦夜來恨隔斷長亭樹漫注念踏青鬪草寒食清明畫羅幫
底城南路東風卷塵去任一片馬蹄紅雨奈多病傷遲暮相逢
須早縱是傾城顏色華年那堪細數

釵頭鳳

天涯遠芳草短零星好夢閒庭院春痕減春愁絕簾幕輕寒落
花如雪怯怯怯 香魂倦風情亂鳳皇飛向釵頭顫春宵闕春

眠窄銀燭將殘玉簫初咽歇歇歇

百字令

春莫坐雨

最難消受是落花時節一聲聲雨費盡傷春閒氣力多謝嘯鵲
辛苦酒薄侵愁鐙寒壓夢長日如年度無情草碧天涯妨我延
伫記得前事關心又小樓昨夜東風如虎禪榻蕭條欺短鬢
不是雙鬟妙舞破寺吹簫中年抱病更有何人妒黃昏幾陣沈
沈簾影催暮

摸魚子

庭中海棠謝矣芳韶過眼觸景言愁

過清明畫橋人散天涯知漸春暮名花一半東風惡又被無情

絲雨愁幾許算只有垂楊尙勸流鶯住海棠怨否問靚影誰憐
別來數日淚眼竟無語芳菲節重憶秋千何處樓高終把人
誤鴛鴦照水橫波媚換了淒涼鷗鷺應更苦縱盼斷江潮不見
雙魚素如今倦旅但酒病詩醫魂消夢受目送亂紅去

南歌子

蝶翠飛難起鴛紅瘦可憐畫樓明月好涼天無奈玉人微病蕩
花前粉浣雲鬟膩珠啼繡枕薦羅衾不奈五更眠一縷香魂
低守藥鑪煙

望江南

陳其年檢討以丙申歲至如皋主冒氏後別去作如皋
憶詞余亦以丙申至皋皋人呼爲檢討後身花間尊前

頗多影事今臥病空山懺除綺習而夢後思夢轉難爲
懷填此寄聲黃鸝谷范予嘉家卿卿諸君皆當時裙展
中人也

如皋憶最憶小門中絲雨細惜鶯背綠書闌低曉蝶衣紅人語
隔牆東

前調

如皋憶最憶盪春橈楊柳夢寒波影蘸蘼蕪塚小酒痕撈斜日
過紅橋

前調

如皋憶最憶玉兒家嬌不成歡珠一串羞難入抱髻雙丫簾底
去呼茶

前調

如皋憶最憶踏青遊
映蝶欺人飛不去
畫羅帶
胃牡丹
惹芳草
思悠悠

紅情

殘紅和朱西生

自君之出便海棠嫁了
都無人惜
低看畫闌一角
斜陽半明滅
賸有芳心未死啼殘淚
鵲痕空濕
看日暮綺散餘霞
催送晚潮急
蕭瑟古牆側
付幾點冷煙土花
淺碧玉人歎息
寂莫朱顏也非昔
難寫愁香二月蕉萃甚
臙脂痕藉化蝶夢空自怨
寶裙壞色

綠意

新綠和酉生

春空夢寂又一簾翠雨香繡苔迹換了年韶依舊傷心怕過踏
青時節天涯不恨無芳草恨去馬玉鞭飛疾盼畫隄柳眼多情
只是少年堪惜蘋際絲風嫋嫋縠紋起縹水都似愁碧天遠
青山人遠青樓恨望暮雲無色羅牕便有銷魂意奈薄暝絮煙
堆積待十年杜牧重來鬢影也應蕭瑟

鷓鴣序

題顧澹園移春圖用夢隱韻

誰禁少年意味教重重掩戶翠簾卷一片殘英又惜花事春暮
綠陰漸稀疏結子天涯幾處餘芳樹更河橋楊柳纏絲但成飛
絮因念樓高繡幕並坐惹濃熏似霧玉笙罷低擁鸞衾夜深

微語懽素倚蘭煙輕圓碧夢拭鴛錦偷拈紅縷甚多情眠起香
蠶滿身愁驚 今還望遠目送江干冶遊若寄旅可再過宅邊
裘帽陌上車馬暖日秋千也無風雨鶯儔繞徧蝶魂守住殷勤
尋譜山薌曲賦驚鴻共載凌波渡流光奈爾匆匆祇有三分已
失野水塵土 潘郎鬢雪畫裏青蛾付鏡中白苧莫細問羅巾
紺唾總是傷心那角池臺者般歌舞飄零感我沈思前事華堂
銀燭含冷淚賸淒涼哀雁畱箏柱相逢尊酒同澆讀曲黃昏舊
人憶否

西子粧

夢草黏天愁陰匝地人比去年還瘦眉山疊疊萬千重鎮無聊
晚風吹縹煙倏雨愁有誰管陌頭楊柳算春來也虧他挨到杜

丹時候 淒涼穀只是重簾冷閉無清晝今年燕子不歸來料
雙棲畫梁難又天涯絮酒深深種他生紅豆暗銷凝燭淚銅盤
漬透

長亭怨

寄王四篁用碧山韻

看門外綠陰濃徧冷雨幽苔小庭孤院酒殘全疎病懷消受恨
何限墜權休拾空惆悵鴛花苑畫壁唱黃河誰想便旗亭人散
天遠問遠天何處教我夢魂飛遠芳洲杜若可喚取鷺鷥同
伴但別後怕去登樓更怕見垂楊春晚記往日相思不似而今
悽惋

月下笛

寄李吟香用石帚韻

短柳門前扁舟自遠隔江風雨盟漚細語采蘋花寄將去并刀
休翦吳淞水怕難翦離愁萬縷悵翠泥落盡朱樓重閉燕子歸
路 延伫相逢處記綠陰濃徧畫廊鸚鵡舊時月冷玉簫聲在
何許黃昏讀曲雙紅豆問頭白詞人怨否歲華晚酒未醒今夜
又是愁度

風入松

秋草

紅心數點暈愁根拾翠憶春人斜陽淡了重描畫徧青山都是
離痕近日裙腰瘦盡不知幾許銷魂 涼陰淒碧掩重門蛩語
又黃昏五更病馬嘶殘驛滯天涯休怨王孫一片蘼蕪小影西

風碾斷香輪

祝英臺近

螢

隱華鐙窺繡闥生小水雲活根化紅心若意肯趨熱草間也有
微光照他青史渾不借天邊圓月 翠簾揭昨宵銀漢中間星
影半明滅西北樓高飛夢畫堂闊輕羅小扇無情欺儂飄泊待
秋冷有人拋撇

前調

蟬

冷棲煙閒吸露仙骨蛻塵土爾許高寒消受晚秋苦憐他短鬢
飄零西風瘦影只薄薄一重紗護 感遲暮相將斷雁哀蛩幽

咽向人訴齊女門前烏桕幾株樹分明落葉聲淒中郎家破有誰和七弦琴譜

清平樂

女兒酒

銷魂名字十五芳年紀近日愁春知醒未未嫁許多情味小鬟低勸金卮春風沈醉休辭澆取一雙紅豆碧桃花底相思

醉太平

衫痕扇痕眉痕鬢痕相思一寸芳痕記桃花小門煙魂雨魂嘯魂夢魂相逢一片愁魂又梨花墓門

高山流水

宋文丞相松風琴榻本

松風一榻響蕭蕭倚天涯霜鬢愁彫夜雨宿青原可憐瘦盡琴
腰傷心事莫話南朝江山付秋壑紅羊劫換白雁聲高念君恩
重處難把壯懷銷 寥寥餘音寄微外天水碧落日寒潮回首
望中原烽火萬井蕭條舊君弦誰續鸞膠斷魂招惟有桐心不
死桐尾先焦賸淒涼玉帶殘墨淚痕飄

一萼紅

吾鄉楊麗生綺年韶思頗喜倚聲往時余爲審定宮調
辨析微芒妙悟擊節久不得音耗填此寄懷

茜牕深記瓊簫度曲眉恨暗侵尋玉夜初涼檀膏半注微聽蓮
漏沈沈斷魂處年華似羽賸花外殘夢託幽禽楊柳青煙海棠
紅雨池館春陰 誰想倦遊詞客甚江湖載酒蘭雪題襟扇底

歌闌綃邊淚聚惜別何況如今自空按霓裳舊曲聽風水誰爲
覓餘音閒趁齋魚粥鼓直恁飄零

賀新涼

讀納蘭容若側帽詞感容若與顧梁汾救吳漢槎入關
事

萬里悲笳起最傷心河梁一別故人天外易水長歌當哭兩
字平安季子竟生入玉門關矣曠世風流然諾重有五陵俠少
能輕利君倘在執鞭弭高才自古逢多忌歎人間蛾眉謠詠
供他羣吠馬上文姬悲遠嫁門戶彫零若此算尙有曹瞞知己
朋友生死恩骨肉論交情豈獨稱文字酹酒問竟誰是

九張機

宋曾端伯樂府雅詞中有九張機一調云傳自九重秀
水朱氏謂見高麗史樂志教坊女弟子楚英奏新傳九
張機用弟子十人余謂據此則每一人唱一張機連末
輕絲春衣共是十一人唱也詞旨古豔得子夜遺意其
韻平上去三聲通協間通入聲此韻學之最古者朱氏
詞綜所選未全暇輒擬爲之

掩面空房氣力微連連織就九張機相思欲贈機中字不
唱盈盈金縷衣

一張機含愁人在畫樓西金梭軋軋流如水華年過了嬋娟二
八長自惜芳菲

兩張機雙鴛鴦綫兩邊齊上邊織箇雙頭蓮雙花雙鳥雙雙偷

覷雙臉各雙偎

三張機玉人微困小腰支懨懨只恨閒天氣往常歡笑綠紗牕
子日影不多時

四張機紅蠶心裏只多絲多情不管難眠起一春蕉萃絲絲吐
盡化作金縷衣

五張機雌雄胡蝶對人飛教他莫逞千般媚小鬟見了兩邊趁
去也有似儂時

六張機中心安柔好花兒好花只在儂機裏要他開到王郎來
後不許再相離

七張機銅壺永漏玉釭垂滿身香汗嬌無力近來消瘦教誰知
得自解繡羅衣

八張機明光織就欲遺誰誰家十萬纏頭費樓高西北紅綃一
曲城上夜烏嘯

九張機機中衛女舊相思天涯草綠人千里從前一段如何拋
却不是不憐伊

輕絲一絲一縷一些兒千絲萬縷心頭淚剪應不斷理還又亂
愁殺玉纖枝

春衣相將怕去踏青隄殷勤只替他人製低徊愛好自家花樣
一向誤佳期

珠歌翠舞畫堂春織女機絲委素塵十二樓臺花落盡可
知俱是斷腸人斂袂而歸相將好去

調笑

此調亦見樂府雅詞前有七言轉韻五十六字以末二字作起調詞綜誤分兩段起調作過拍大是疎謬案淮海集憶秦娥四首前有七言二十八字以末三字作起調宋人詞往往有之爲選家所割去耳

遙憶春城貴主家
玉簫金瑄厭繁華
尊前翠燭三更倦
樓上紅簾四面遮
羅衣坐歎秋風早
銀漢中間波淼淼
保姆無言侍婢癡
盛年光景空愁老

愁老惜生小
簇簇穠粧珠翠繞
黃金壓扁雲鬢悄
行步衣香風裊繡裙百襴雙花鳥
簾外海棠開了

石家金谷寵名姝
門損腰支玉不如
主人恩重偏爭妬
房老身閒強自娛
雲腮霧閣從容坐
秋月春花等閒過
一斛

明珠萬斛愁綠珠宛轉紅樓墮

樓墮惜嫋嬌蛤帳春風嬌婀娜粉身未報恩情大一陣落花無
那主人昨夜華堂坐玉簫聲聲入破

芬陀利室詞集卷一終

紅蕤閣韻卿內史校字

芬陀利室詞集卷二

寶山蔣敦復純甫著

長洲王韜仲弢棻

碧田詞

秦樓月

二分明月女子小影

芳心怯二分偷占揚州月揚州月碧天秋思玉人愁絕 星娥
小影銀灣濶夜深悄憶瑤臺別瑤臺別滿身風露廣寒宮闕

蝶戀花

眉月一絲如我冷瘦到難描怕見青鸞鏡倦又不眠眠又醒
慊只道三分病 彈指流光愁暗省拈取心香偷祝花長命簾

底小魂飄不定峭風吹過紅無影

菩薩蠻

和溫飛卿韻

瑤僊夢碎玻璃枕鴛愁綠繡芙蓉錦簾額盪珠煙夕陽如病天
相思嫌味淺芳緒金刀翦無處拾殘紅畫樓楊柳風

浣谿紗

手卷珠簾上翠櫺涼蟾微映畫羅屏並肩私語拜雙星薄有
秋痕花露白淡無鐙影藥鑪青夜涼人去酒初醒

揚州慢

獨步秣陵東城尋明故宮遺址寒煙衰草舉目可憐填
白石中呂宮一闋弔之

牧馬西風暗蜚殘堞故宮綠徧秋蕪間漁樵白首也一半模緜
莫重認琉璃片瓦碧苔荒矣年月都無更粧樓何在當時誰畫
眉圖 秣陵王氣算先朝遺恨南都儘鳳閣龍樓江山麥秀夜
月啼狐漫說寶衣化蝶寒煙古井落青梧祇金魚池水年年猶
長菰蒲

高陽臺

馬湘蘭故居在孔雀庵側當時曲中所謂風流人豪也
繡檻雕闌盡爲廢地草間秋蟲聲與鐘魚相贈答僕本
恨人每傷往事填此解令秦淮女兒倚簫歌之當不減
一聲河滿

水碧湘裙苔青畫屨一庵秋夢蕭蕭燕子飛來傷心怕問前朝

芳犀已抵千金重，祇憐才兩字，魂銷帶愁描。露葉娟花，廿五離騷。粧樓粉黛都銷歇，聽魚山梵唱，夜雨無憀。三尺香墳，他時杯酒，須澆脂田一稜。瓢兒菜，峭西風吹上，寒潮舊紅橋。幾樹垂楊，幾處瓊簫。

前調

八月十九夜，泛舟秦淮，歌聲起于水上，渺渺兮予懷也。黛影橫波，奩痕翦碧，題襟人在蘭舟。今夕天涯，不知何處瓊樓。犀鉤淡似纖纖月，挂疎簾，又挂閒愁。倚秦篝，悄拍銀檀，怕按梁州。無情畫舸西風起，任萍花吹散，總是悠悠。冷落青衫而今，可說風流。芙蓉不作雙鴛夢，恁淒涼，偏學鷓鴣，記來遊如此江。

山一曲悲秋

西子粧

偕孫月坡遊益山四松庵

著屐尋詩拖筇入畫雁外一天秋思螺峯疊疊峭生愁古牆陰
亂蟲聲起涼波影裏有幾點疏花搖曳問西風甚今年瘦得垂
楊如此 高樓外巖桂青時招隱人歸矣枯瓢只合挂松關笑
閒雲又飛塵世吟懷料理好攜手鷗盟鷺契下斜陽衣上空山
冷翠

洞仙歌

題月坡秋露詞

江湖倦矣贗琴邊詞賦庾信愁多鎮吟苦似么花病蝶碎葉零
蟬苔影碧涼透一簾絲雨 鳳簫聲未歇替訴飄流翠袖盈盈

淚如許煙外秣陵秋瘦了斜陽更瘦到舊時鷗鷺待畫壁雙鬢
唱黃河怕酒醒天涯斷腸金縷

金縷曲

秦雪舫郎中青溪訪舊圖

簾卷人初起問西風黃花瘦了是誰還比落絮因緣畱不住判
與蕭郎別矣又薄命再隨流水絕代名姝悲失路算蛾眉金贖
譚何易銀燭冷淚如洗 人生大抵銷魂耳况相逢淒涼如夢
舊情曾記玉骨珊珊無一把難免天寒袖翠有著意溫存能幾
梁燕而今棲未穩替綢繆早作量珠計楊柳外畫樓倚

百字令

經阮嗣宗墓下作

一堆黃土勸卿休白眼我來澆酒痛哭平生才子淚此淚除卿
安有我亦當年最傷心者官落千秋後風流盡矣青山今日回
首多少典午衣冠禪文九錫人世何雞狗黨籍遺風高士傳
玉骨棱棱不朽龍性難馴鴻飛已冥以酒全其壽茫茫萬古醉
魂知尙醒否

虞美人

重過秦淮最銷魂處

藥爐煙瘦如香篆不把重簾卷小鬟低語客來時記得玉人扶
病下樓遲
瀟瀟怕聽吳娘曲夜雨明金屋零花一寸冷秋紅
只問海棠何事嫁西風

玉漏遲

殘月和孫月坡

瘦蛾描不盡黃昏去也畫簾低暈已是團圓忍撇半邊清韻幾
度青天碧海早換了姮娥霜鬢銀漢隱沈沈漏點燭花初燼
問他十五華年只幾日慇懃便成消損一角紅墻賸有獨眠人
恨憐取纖纖舊樣怕又負瓊樓芳訊圓未近待教玉容重認

齊天樂

空樓和月坡

杏梁燕去芳巢冷佳人卽今何在草沒朱門塵封碧瓦風雨綠
紗牕壞繁華易改歎一夢成煙萬花如海漫與雲齊迢迢西北
暮愁外滿湖尙流粉水瘦蛾都掩了遠岫凝黛脂盞香銷榼
臺鏡墜十斛量珠難再明蟾又挂賸寂寂簾衣玉鉤敲碎悄立

星鬢夜深搖翠佩

長亭怨

衰草和湯雨生都督

看何處最銷魂地一片斜陽二分荒土壤色羅裙峭風吹送北
邨雨畫衫扶醉能幾日踏青去瘦影冷蘼蕪恨減盡好山眉嫵
愁緒賸紅心脈脈目斷送君南浦高樓望遠奈千里沅湘遲
暮祇今日蕉萃青袍問誰采天涯芳杜把怨愁重彈中有離騷
廿作五

前調

衰柳和雨生

又吹盡西風瑟瑟悄倚危闌怕臨流水散了萍花隔江煙靄渺

離思馬嘶病驛聽四面角聲起鬢已不成絲怎禁得飄零如此
彈指望高樓不見只見暮雅歸矣哀蟬落葉問誰慰那人憔悴
怨玉遂瘦減蛾顰定不似舊時眉翠記絮冷關河萬點齊銷
鵲淚

玉漏遲

秣陵返櫂後月坡有詞見懷次韻答之

錦牋題字遠佳人別矣淚花風翦瘦燭曉紅可有綺懷消遣芳
事江南又阻悵天末一繩涼雁秋夢斷冷蟬幽咽鳳簫聲畔
幾重煙水秦淮有垂柳絲絲畫樓清怨酒淺愁深不似那時心
眼點鬢霜華漸老問誰慰篋中紈扇黃葉滿關河歲寒相見

月底修簫譜

雷約軒通波水閣填詞圖

芷雲深。蕢夢淺。草閣枕孤渚。鏡檻平波。波上有鷗住。微茫幾點
煙螺。兩三沙雁紅。畫出冷斜陽暮。尋好句。分明一段荒寒蘆
白。卷涼雨。圓渚湖邊。相約伴漁父。湘弦彈瘦。秋花水仙都醒喚。
小艇載將愁去。

疏影

簾影

黃花瘦矣。卷西風一桁。和夢吹起。庭院深深。挂在月明誰家。今
夜秋思。明河不隔玲瓏望。怕瞞了雙星密作。誓曳縞衣。盪冷琉璃
滴碎鳳綃清淚。疑向瑤臺路入。把珍珠曉揭。尙帶霞氣。十
二瓊屏。瞥見橫波剛近。日高梳洗。非煙非霧。情無著。渾纖就鴛

愁如水待燕歸訴與相思越恁翠沈沈地

前調

闌影

芳眠芍藥正春酣夢怯壓損亭角香霧一重夕照一重重重倒
映池閣退紅十二無人靠閒搭住柳絲輕薄甚舊家盡日悵悵
滿院刺桐花落 知否下堦小立纖腰曾凭久心事猶昨行過
曲^作廊冷冷清清悄地綠陰如幕斷腸天氣渾難倚誰寄語東
風休惡認翠苔幾點荒愁半墮絮煙漠^作漠

前調

屏影

碧秋夜色照翠螺六六離思淒寂銀燭無情如水華堂夢魂來

處偏隔黃昏有箇人難睡問渡否牽牛消息最可憐淡月濛濛
那角繡鞵曾立惆悵朱門已改題詩都不見塵蹤紗幮一曲
春陽舞倦弓腰畫裏青娥呼出少年射雀空憔悴算只有鳳簫
知得憶舊遊莫似巫峰化作彩雲無迹

前調

以去上叶韻一名解佩環依元彭元遜體與前一首同

帳影

紅珠翠羽記牽來並坐樓上聽雨寶蒜垂垂連漏沈沈蠟燭明
明無語春風搖盪春雲熱只此際魂銷先許怕夜來尙怯輕寒
睡足海棠嬌護剛破梅花冷夢算香衾又負芳事多阻似怨
檀奴悄未周防一點銀蟾遙妬芙蓉四壁秋波繞但莫放鴛鴦
飛去想佩環縹緲非耶悵望碧紗成霧

好事近

拆碎枕函看底事教人無夢誰費鴛鍼繡綫把離愁合縫黃
昏無計遣東風一陣峭寒送不分今宵酒醒祇蠟花情重

紅情

顧子山比部鴛紅詞館圖

夢爲蛺蝶儘此生消受名花憐惜一點紅情除是文鴛許相識
絮盡春愁燕子待忘了都還成憶怕涼雨飛上冰弦波際碧雲
濕小立畫屏側想羅帕舊題腸斷詞客蓮房露滴翠蓋亭亭
覆雙翼多少瑤京清怨算只有桃鬟知得記昨夜簾幙靜玉人
擣遂

臺城路

陳小魯侍其大父厚甫觀察遊杭時乞戴醇士閣學畫
冷泉諸勝返吳門後乞劉彥冲布衣畫山塘諸勝皆名
筆也合裝一卷題曰鷺峰虎阜屬爲填詞

青山那是無情物斜陽自成今古虎阜雲荒鷺峰石冷添了碧
苔無數支筇好去認越角吳根野橋歸路茸帽蕉衫水天涼影
喚鷗渡 吟牋舊題古寺紅牆看一帶落葉如雨古木陰圍寒
泉響答分付齋魚粥作平鼓江湖倦旅看幾度星霜幾重煙樹甚
日來遊畫中搖瘦榜

憶舊遊

小魯故鄉無此好湖山長卷

記金牛湖上門對青山畫閣停橈一抹疏籬影正初二碧夜第

六紅橋垂楊尙有幾樹瘦過沈郎腰
恁負了盟鷗萍花散也目斷春潮
迢遙故鄉住祇唱到吳娘暮雨瀟瀟
相別相思地算西湖西子一樣魂銷
消磨兩處風月殘夢話漁樵待縛箇
茆庵閒尋野笠攜短瓢

買陂塘

山塘感事

盪湖煙紅牕六柱滿湖都是花氣芳魂
一縷隨風引值得此中銷未情早繫
愛生小吳娘祇抱鴛鴦睡珠簾近底
有眉語些些三喚尖疊疊幽怨鳳簫
寄山塘路十載青衫蕉萃畫船聽雨
曾記尋前便解相思苦不待管弦終
矣臨別意怕黛點飛霜夜夜吹腸浪
蕩波又起似重見春人回身碧玉依
約好年紀

三二月不怕離人不老斜陽淡照又零落金衣一絲空裊歌罷
旗亭玉聰嘶去了

前調

燕聲和順卿

黃昏怎會人言語生憎畫梁雙燕綠翦春痕香棲瘦影似說今
年寒淺商量幾徧記簾幙愔愔那家庭院舊日梁空玳泥零落
有誰管 重門又成閒阻一襟分細雨低訴芳鈿翠袖題牋瑤
釵寄淚竚想桃花人面年光未賤但咒盡東風落紅難見對語
喃喃絮愁和夢卷

陽臺夢

和後唐莊宗韻

繡鴛鴦綫畱花縫淚絲衫繫春愁重香巢並影不成樓有綠毛
小鳳 羅牕人病起剛被瑤琴三弄落紅如雨燕歸簾一覺天
涯夢

角招

此黃鐘清角調也以閨怨寫之音旨淒絕

萬花暝疏簾又盪湘煙半墮蟾影玉釵敲夜靜燭暈碎紅蘭焰
孤炯香鬟怕整恁獨自淒涼驚鏡不怕傷春成病但屈指未歸
人莫高樓閒凭 誰省黛螺怨凝冰奩麝滅繡戶侵苔徑五更
風暗打一角紋紗吹開鴛燈鵲唬夢醒儘幾許離愁催迸那是
瑤壺漏永淚珠點滴齊飄霜華冷

唐多令

索性不思量將愁擲酒鄉怪今宵酒也淒涼道是淒涼緣中酒
酒又醒五更長莫是怯思量教愁來夢鄉笑今宵夢也荒唐
算作荒唐尋好夢怕不是那人粧

念奴嬌

麗娃鄉駙馬府祀張吳行省左丞潘元紹明兵下元紹
姬七人雉經死吳亡元紹妻金枝公主投水死皆可哀
也爲詞弔之

梧宮秋矣正西風黃菜滿城鼙鼓小劫紅羊緣底事豔骨一堆
荒土身殉君王恩憐夫壻判絕從泉路白駒淒唱後庭腸斷歌
舞可惜芳腴桃根朱絲畢命綺恨拋兒女葬罷瓊姬鵲血冷
不是秦樓簫侶玉桺煙銷珠房粉碎慘澹花無語麗娃鄉裏月

明環珮來去

虞美人

春寒惻惻渾難定有箇春人病蘭愁擁髻可憐他又是天涯芳草不能歌一枝清瘦棠梨影小院沈沈靜柔魂能殼再銷麼行到悄無人地落花多

百字令

小魯寄廬主客圖

年光如此任江湖冷落古風今雨渺渺離懷忘不得多少天涯萍聚一碧苔痕雙紅豆子草綠長亭路牕前昨夜梅花遲爾爲主客有對此茫茫飄飄泊鳳浩蕩閒鷗語修竹吾廬何處是大抵浮生逆旅孤岫團雲寒空散雪舊夢都蘭絮題襟重憶相

思他日延佇

金縷曲

題子山比部擷芳詞後

誰是多情者爲名花香熏絲繡深深拜下一朶靈葩才子筆十
幅鸞牋揮灑便不許芳華彫謝微雨惜惜簾底坐替美人小影
臨風寫紅燭冷填詞罷 工愁我亦真無奈怕人閒丁香未結
海棠先嫁莫唱江南腸斷句只恐聞歌子野更十萬金鈴誰借
惆悵碧桃天上種枉瑤臺小謫真無價絳樹外花開也

聲聲慢

自題紙閣雙聲圖余與靈石內史小隱羅敷溪上杜門
謝客時與婦飲質釵問字淪茗弦詩好事者欲題品在

凡夫卿子間爰爲是圖並填詞解嘲云草牕體

牽蘿人瘦倚竹天寒故山鼓桂誰畱賃廬依然壻鄉小隱風流
菱花倩描冷黛上眉痕總帶些愁愁細問怕玉梅開矣猶滯歸
舟莫更牛衣中夜笑十年英夢都付悠悠天際蘋鴻而今也
學蓮鷗瑤琴聽伊彈罷醉金尊我拂吳鉤同證取看五湖煙水
片席高秋

瑤華

題陸蓉初梅影草堂詩餘

香銷酒力鐙翦秋心把瑤華重讀佳人清怨金雁語纖手七條
寒玉靡蕪采采想日暮空山芳躡記夢痕如水愁多煙外岫蛾
凝綠中年我已銷魂正窈窕無言羅袖吹竹凌波步小仙佩

響誰在紅闌干曲洞簫按罷算只有雙鬟能續正月明瘦影橫
斜今夜翠禽啼足

齊天樂

題王叔彝寄深寫遠齋詩餘

瑤波淡寫湘妃怨美人洞簫聲起霜簾泠泠煙痕渺渺一片碧
山花外幽懷漫寄聽低唱微雲袖雙扶翠慘綠垂楊絲絲金縷
畫船機鱸鄉便攜俊侶鷗邊清事足銷盡羅綺紅燭填詞青
樓側帽那許年芳如水銀灣影裏問何處瓊樓峭風仙佩夢去
羅浮月明騎鳳子

念奴嬌

擬陳西麓體代閨人寫意

小樓人去是誰教明月照向空房一夜梅花千里夢無言獨自
昏黃雁不牋愁蛭難絮恨塵滿舊琴囊朝來鵲噪鄰家夫壻還
鄉猶記簾底牽衣尊前閣淚此際怕思量病骨天寒無一把
消受薄薄衣裳卿自須憐儂還是福鏡裏守容光少年過也不
成長恁疏狂

徵招

往時遊南沙瀟煙樓主人以弟子禮事余低鬟薄鬢蕉
萃可憐臨別淒然懼芳年之不永今香銷玉殞遂成語
讖用白石黃鐘下徵調弔之幽咽之音不能卒曲

一堆豔骨薶荃土三生綺愁休矣私語祝東風把落花扶起相
思題鳳紙誰忍作海棠哀詠蘭夜如年玉人多病斷腸天氣

猶記鎮懽懽銀鐙畔無言更含淒淚金縷最飄零感秋懷身世
瓊蕤畱小字早怕與芳華俱墜翠鴉苦冷月昏黃弔女蘿山鬼
疏影

夢

遙如怨獨問楚天暮雨誰會芳躅今夕淒涼可許溫存飛近睡
裏蛾綠梨雲不隔春江水但莫遣翠禽啼足怕黃昏一半迷離
照與畫屏銀燭誰省佳期早誤酒醒思往事心上羞觸簾也
垂垂鐙也涼涼人也深深金屋紅珠斗帳紅蕤枕想修到鴛鴦
穠福奈者遭瘦了文園冷絕曉僊難續

浪淘沙

愁似萬楊絲雨打風吹紅闌幕地費尋思將就尋思將息好生

怕將離 消瘦苦禁持 懊惱歸遲 被誰欺負 只天知 知道薄情
應不保 自去憐伊

風入松

憶吳門舊遊

峭風吹冷綠楊枝 微雨碧絲絲 青袍蕉萃 青樓遠恨 無人說與
相思 短簿祠邊 載酒麗娃 鄉裏填詞 春情回首 夢依依 芳訊
海棠知 秋孃舊日 閒身價問 新愁可上 纖眉 只有一枝玉 遂當
時低勸金卮